



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZP.Anr.53/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët Hidajete Gashi Alaj, kryesuese, Kujtim Pasuli dhe Ramush Bardiqi anëtarë, duke vendosur lidhur me ankesën e Subjektit Politik Lëvizja Vetëvendosje (LVV) me seli në Prishtinë, paraqitur kundër subjektit politik, Aleanca për Ardhmërinë e Kosovës (AAK) me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, në ditën e votimit, për Zgjedhjet e Parakohshme për Kuvendin e Republikës së Kosovës të mbajtura në 28 dhjetor 2025, në seancën e panelit të mbajtur, më datë 30.12.2025, merr këtë:

#### VE N D I M

I. PRANOHET E BAZUAR ankesa ZP.Anr.53/2025 e datës 28.12.2025, e parashtruar nga Subjekti Politik Lëvizja Vetëvendosje (LVV) me seli në Prishtinë.

II. Subjektit politik Aleanca për Ardhmërinë e Kosovës (AAK) me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, në ditën e votimit me datë 28.12.2025, i shqiptohet dënimi më gjobë në lartësi prej 1,000 euro (njëmijë euro).

III. Detyrohet Subjekti politik Aleanca për Ardhmërinë e Kosovës (AAK), që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

#### A r s y e t i m

Me datën 28.12.2025, PZAP-i, ka pranuar një ankesë të Subjektit Politik Lëvizja Vetëvendosje, në të cilën pretendon se më datë 28.12.2025, në ditën e heshtjes zgjedhore të Zgjedhjeve të Parakohshme për Kuvendin e Republikës së Kosovës, Gazmend Syla, kandidat dhe mbështetës i subjektit politik AAK, ka publikuar një postim në rrjetin social Facebook, të shoqëruar me fotografi dhe me thirrje të drejtpërdrejta për votim.

Tutje, në ankesë është theksuar se, në postimin në fjalë, autori shprehet tekstualisht: “Votua me listën më të mirë në Kosovë. Ju lutem, dilni dhe votoni! #AAK, Ramush Haradinaj#, Krah Teje”, postimi është bërë publikisht, është i qasshëm për një numër të pakufizuar qytetarësh dhe ka arritur ndërveprim të konsiderueshëm, duke pasur potencial real për ndikim me

vullnetin e votuesve në ditën e zgjedhjeve, me këtë veprim ka bërë shkelje të nenit 37 të Ligjit 08/L-228 për Zgjedhjet e Përgjithshme në Republikën e Kosovës që ndalon çdo aktivitet fushate gjatë periudhës së heshtjes zgjedhore dhe nenit 8, paragrafi 1, nën paragrafi 1.5 i Rregullores Zgjedhore 07/2024. Si provë, parashtruesi i ankesës ka bashkangjitur postimin që dëshmon shkeljen e tillë në ditën e zgjedhjeve. Andaj, parashtruesi i ankesës kërkon nga PZAP që të shqiptojë masa ndëshkuese të parapara me ligj ndaj subjektit politik AAK.

Në përgjigje në ankesa Subjekti Politik AAK, ka theksuar se, e kundërshton në tërësi ankesën e ankuesit, duke e konsideruar të pabazuar, për faktin se nga përmbajtja e fotografisë dhe nga përshkrimi i saj nuk mund të interpretohet se ka pasur thirrje për votim të subjektit politik AAK, por thirrje e përgjithshme për shfrytëzimin e të drejtës së votës për qytetarët. Tutje, në përgjigje ka shtuar se, përshkrimi i fotografisë është i qartë, fjalia e parë shprehimisht thotë: “Votua listën më të mirë në Kosovë”, fjali e cila kjo shpreh cilësimin e listës nga ana e kandidatit. Fjalia e dytë shprehimisht thotë “Ju lutem, dilni dhe votoni”, fjali kjo e cila përbën thirrje për shfrytëzimin e drejtës së votimit në përgjithësi. Përderisa në rreshtin e tretë janë të vendosura thirrjet, të cilat në zhargonin social njihen si hashtag dhe si të tilla janë sugjeruar nga vet rrjeti social bazuar në postimet e mëparshme të bëra nga profili konkret social. Andaj, subjekti politik AAK i propozon PZAP-it ta refuzoj ankesën e parashtruar nga subjekti politik LVV.

Paneli Zgjedhor për Ankesa dhe Parashtresa, pasi që shqyrtoj dhe vlerësoi ankesën gjeti se:

Ankesa është e bazuar.

Paneli pas shikimit të shkresave të lëndës, ankesës së ankuesit, përgjigjes në ankesë të paraqitur nga Subjekti Politik AAK, vlerësoj se pretendimet e Subjekti Politik LVV janë të bazuara dhe si të tilla i aprovoj për faktin se veprimet e përshkruara në ankesë paraqesin shkelje të dispozitës së nenit 37 paragrafi 1 nën paragrafi 1.1 dhe 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet. *”Nga hapja e Qendrave të Votimit për votim, e deri në mbylljen e tyre, subjekteve politike, mbështetësve ose kandidatëve të tyre, u ndalohet secili prej veprimeve si më poshtë: 1.1 shpërndarja ose shfaqja në mënyrë tjetër në ndonjërin nga Qendrat e Votimit, dhe oborri i së njëjtës, e çfarëdo lloj materiali me qëllim ndikimi të votuesit; 1.2. bërja e fushatës në çfarëdo mënyre. Po ashtu me dispozitën e nenit 8, paragrafi 1, nën paragrafi 1.5 i Rregullores 07/2024, është paraparë që: “Nga hapja e Qendrave të Votimit për votim, e deri në mbylljen e tyre, subjekteve politike, mbështetësve ose kandidatëve të tyre, u ndalohet secili prej veprimeve si më poshtë: 1.5. shfrytëzimi i mediave lokale ose ndërkombëtare dhe rrjeteve sociale me qëllim të ndikimit tek votuesi”.*

Paneli, konform nenit 13 par. 7 të Rregullores Nr. 01/2025, për Procedurat e Parashtrimit dhe Vendosjes së Ankesave, me të cilin parasheh “Paneli para se të vendos lidhur me ankesën mund të kryej hetim nëse e konsideron të nevojshme dhe të arsyeshme.” Andaj Paneli ndërmori hetim lidhur me pretendimet e përgjigjes në ankesë të subjektit politik AAK dhe gjeti se e ankesa nga subjekti politik LVV është e bazuar, pasi që nga hulumtimi dhe verifikimi në rrjetin social Facebook shihet se kandidati dhe mbështetësi, Gazmend Sylja, ka bërë publikimin në rrjetin social Facebook me hashtag në mbështetje të subjektit politik AAK

me datë 28 dhjetor 2025 në ora 14:25 minuta kështu duke shkelur rregullat për heshtjen zgjedhore në ditën e zgjedhjeve.

Andaj duke u mbështetur në nenin 117.3 të LZP-së ku përcaktohet se: “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet në ankesë janë të qëndrueshme dhe si të tilla i pranoi, sepse kjo shkelje ka të bëjë me faktin se veprimi i përshkruar në ankesën e parashtruar është në kundërshtim me dispozitat e nenit 37 paragrafi 1 nën paragrafi 1.1 dhe 1.2 i Ligjit NR.08/L-228 dhe nenit 8 paragrafi 1, nën paragrafi 1.5 të Rregullores zgjedhore 07/2024. Në rastin konkret Paneli vlerëson se postimi i fotografisë në rrjetin social Facebook në ditën e zgjedhjeve pranë objektit shkollor me mbishkrimin “Votuar listën më të mirë në Kosovë. Ju lutem, dilni dhe votoni! #AAK, Ramush Haradinaj#, Krah Teje”, është veprim që bie në kundërshtim me nenin 37, paragrafi 1, nën paragrafi 1.1 dhe 1.2 të Ligjit nr. 08/L-228 për Zgjedhjet e Përgjithshme në Republikën e Kosovës, pasi veprimi është bërë në vendvotim e që ka për qëllim ndikimin tek votuesit.

Paneli, me rastin e shqiptimit të gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes si dhe ndikimit të mundshëm të saj në procesin zgjedhor në fjalë, kjo për faktin se Subjekti Politik AAK ka qenë i njoftuar me obligimet dhe përgjegjësit gjatë procesit të votimit.

Paneli ka vlerësuar edhe përgjigjën në ankesë të subjektit politik AAK, në të cilën kanë pretenduar se nga postimi i kandidatit dhe nga përshkrimi i fotografisë, nuk mund të interpretohet se ka pasur thirrje për votim të subjektit politik AAK, por thirrje e përgjithshme për shfrytëzimin e të drejtës së votës për qytetarët, mirëpo për Panelin këto pretendime nuk qëndrojnë pasi që subjekti politik AAK në përgjigje në ankesë nuk ka bashkangjitur asnjë provë që do të dëshmonte të kundërtën e pretendimeve ankimore dhe provave të bashkangjitura nga pala ankuese. Andaj, pretendimet e tilla mbetën vetëm në nivel deklarativ dhe të pa argumentuara me prova konkrete.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 dhe neni 120 paragrafi 1 nën paragrafi 1.3 të LZP-së, Paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa  
ZP.Anr.53/2025 datë 30.12.2025

Kryesuese e Panelit  
Hidajete Gashi Alaj



KËSHILLA JURIDIKE: Kundër këtij vendimi nuk lejohet ankesa konform nenit 118 par. 4 të Ligji Nr.08/L-228 për Zgjedhjet e Përgjithshme në Republikën e Kosovës.